




COMMUNICATIONS AND
MULTIMEDIA CONTENT FORUM OF MALAYSIA
Forum Kandungan Komunikasi dan Multimedia Malaysia

ANCAMAN BULI SIBER DI MEDIA SOSIAL

Oleh Forum Kandungan Komunikasi dan Multimedia Malaysia (CMCF)



Buli siber di media sosial sering berlaku dalam kalangan remaja.

MASYARAKAT pada masa ini mempunyai kemudahan untuk mengakses teknologi komunikasi, antaranya termasuklah melalui e-mel, blog, dan media sosial. Disebabkan perkembangan teknologi tersebut, isu yang sering muncul dalam kalangan pengguna, khususnya remaja ialah buli siber.

Menurut *Kamus Dewan* edisi keempat, buli didefinisikan sebagai perbuatan mendera dan mempermainkan seseorang supaya dapat menyesuaikan diri dengan suasana baharu. Siber pula bermaksud perkara yang berkaitan dengan komputer dan internet. Dalam hal ini, buli siber bermaksud suatu bentuk gangguan dalam dunia digital dan secara kebiasaannya melibatkan penggunaan kata yang tidak sopan secara berulang-ulang.

Ancaman buli siber di media sosial sering kali berlaku dalam kalangan pelajar dan golongan remaja. Gejala ini menjadi

satu jenayah baharu yang mampu memberikan implikasi yang negatif sekiranya tidak ditangani secara serius oleh semua pihak, termasuklah diri sendiri. Hal ini dikatakan demikian kerana buli siber berupaya untuk mempengaruhi keadaan mental dan emosi seseorang.

Oleh hal yang demikian, gejala buli siber tidak seharusnya dipandang remeh dan perlu dicegah dari akar umbi lagi. Sebagai contohnya, memberikan pendidikan awal tentang padah gejala buli siber, bak kata pepatah melentur buluh biarlah dari rebunginya. Hal ini dikatakan demikian kerana personaliti seseorang itu bergantung pada persekitaran di rumah, sekolah dan juga dunia internet.

Justeru itu, pihak Forum Kandungannya Komunikasi dan Multimedia Malaysia menyarankan agar para pengguna mengamalkan kawalan sendiri ketika melayari media sosial. Dengan mengamalkan prinsip tertentu, para pengguna berupaya untuk menghindari ancaman buli siber tersebut. Panduan kawalan sendiri yang boleh dipraktikkan seperti yang berikut:

Kenali Rakan Media Sosial Anda

Para pengguna media sosial disarankan untuk menyemak semula kenalan yang terdapat dalam akaun media sosial yang dimiliki. Sekiranya terdapat pemilik akaun media sosial yang tidak dikenali, mohon *unfriend* dengan segera untuk mengelakkan daripada berlakunya hal yang tidak diinginkan.

Menyimpan Bukti

Simpan segala teks perbualan yang diterima daripada pemangsa buli siber yang berkemungkinan dapat dijadikan sebagai bahan bukti. Oleh hal yang demikian, para pengguna dapat membela nasib sekiranya menerima tohmahan daripada pihak ketiga.

Sekat

Tekan butang *block user*, *unfriend* atau *unfollow* jika terdapat pihak yang mengganggu keselamatan,

Forum Kandungannya Komunikasi dan Multimedia Malaysia menyarankan agar para pengguna mengamalkan kawalan sendiri ketika melayari media sosial. Dengan mengamalkan prinsip tertentu, para pengguna berupaya untuk menghindari ancaman buli siber.

menyebarkan fitnah, dan hasutan. Hal ini mampu mengurangkan implikasi negatif terhadap pengguna.

Laporkan kepada Ibu Bapa, Penjaga atau Guru

Para pengguna juga digalakkan untuk melaporkan kepada orang yang lebih dewasa, seperti ibu bapa, penjaga atau guru, sekiranya dibuli di media sosial. Selain mengemukakan aduan terus kepada pihak pengurusan laman sosial, para pengguna juga disarankan untuk melaporkan gejala buli siber kepada Suruhanjaya Komunikasi dan Multimedia Malaysia dan Polis Diraja Malaysia.

Kesedaran semua pihak amat penting untuk memastikan para pengguna di media sosial, terutamanya dalam kalangan pelajar dan remaja berada dalam persekitaran yang selamat. Tanpa usaha yang berterusan, pengabaian terhadap ancaman ini seakan-akan mempertaruhkan soal keselamatan, kesihatan dan kebajikan mereka pada masa akan datang dalam situasi yang berisiko.



Gejala buli siber memberikan impak negatif terhadap mental dan emosi seseorang.